

公期以乘時建樹相與歔噓泣下公亦不禁慷慨澄清之意故其殫竭圖報所靖獻必軍國大計秉鐸畿輔力挽頽靡闡揚文教於以光裨聖天子中興之治亦既沐寵異陟尊優台衡之業翹足可踈遽以勞隕京邸可勝惜哉贈中憲公諸生時與柳州先文端公相慕好互期以公輔贈中憲公志卒未酬公既致身通顯說者謂竟先人之未竟固在公乃公亦若有未竟也可勝惜哉然公階僅四品歿之日至動九重震惻賜兆加邊行被殊恩邑人士感德頌義爲請之御史臺崇祀鄉賢食報千秋公亦可以瞑已銘曰厥德如璧道如矢爲古循良名直指厥身出處關泰否愠於羣小媚於天子厥用未殫胡以歿九重致悼兩楹崇祀千秋而下聞者興起

涼莊道西嶽崔公墓誌銘

趙士麟巡撫侍郎雲南人

歲甲子上諭滿漢大臣會舉天下廉能官員以備擢用廷薦用七人推楊州太守崔公爲天下清官第一兩江總督缺公以郡守得列會推從來未有之希覲也余時撫浙聞而訝之曰此必素履潔清摻持嚴毅者也又必雄才肆應利犀斷物者也然廉者必刻律己繩人或過矯激者也才者必矜揮霍震動殆絢耀一時者也否則始終易渝改圖